

上清高上滅魔洞景金元玉清隱書經

承三

上清高上滅魔洞景金元玉清隱書經 承三

太微天帝君間居於明霞之上瓊闕之內金  
華之房合變冥樞蕭朗上契曲寢瑤室時安  
龍山清齋三年乃命太素三元上皇五賢之  
賓檄落萬靈理召千真九天齊陳八帝停輪

披朱見於玉戶陰申列於瓊門爰有九皇上  
真上元禁君超玉虛之天啓五真之房帶逸  
錄之符乘三素之輶上詣玉清太微天帝君  
顯靈蓋而後乘焉是時玄始暎朗天元敷陳  
河海靜波八風散煙慶雲接於龍軒景浮揚

於九玄金仙乘越大帥仗幡天丁前驅高鋒  
厲天九靈啓路四明扶輪飛旌萬塗羅騎億  
千躑躅於瓊闕之下揚華於明霞之巔靈儀  
闡備莫不畢陳於是太微天帝君方復曲宴  
瓊室重誦洞章歌紫虛之靈辭琅微音於七

卷三

玄于時乃命太微上真勅使羣靈整甲齊鋒  
乃登八瓊玉輦駕玄景之暉太霞部靈引日  
俠月七晨合明二星驅除火甲揚精八素啓  
輿元剛衛兵羽蓋停空萬騎相傾毒龍翼軒  
飛煙繞輶戴玄上之華幡煥流金之火鈴五



霞陳曜六度休明撫九華之鳴鐘打碧鼓之  
玄英撞金折玉叩漱拍瓊龍吟虎嘯鸞舞鳳  
鳴八音同和萬律齊聲雲璈絕玄天女羅箏  
法響時奏續節上呈天鈞四陳廣樂虛庭神  
虎仰號天獸羅兵逆鱗四喙振豪奮形銜刀

割魔揮劍捕靈伺六天之凶夫斬山嶽之邪  
精羽騎浮空神鋒曜明揮輪玉字揚華上清  
望雲景而徊輦逐傾蓋於霞城既至良久於  
是上皇玉帝君乃命玄羽玉郎太保真人出  
迎太微天帝君徐引使前遂眄於瓊房焉太

微天帝君乃稽首伏於窻軒之下進拜於帝  
皇之机憑瓊顏而妙感仰靈眸而陳辭曰

賤臣幸化重悟凝玄得司帝位領括羣真浪  
虛津於七覺遂鳴玉於霄上希清玄之神塗  
想玉虛之神王實亦妙眇於玄流奏冥心於

承三

遐方而天尊高秀靈蓋顯照垂觀下流已弘  
大恩矣於是

上皇玉帝君乃推机偃詠虛眺太空吟玉清  
之隱書歌元景之靈章玉音遐璨清微琅振

其辭曰



上景發晨暉金霄鬱紫清三素曜瓊扉玄上  
昭虛靈手掇青林華迴蓋太无庭寢宴頤綠  
房飛步秀玉京一携朱景玉長煙亂虛營玄  
歸自可保何以外然无生四王宅誰身變分豈  
一形欵欵推妙品混爾至氣明於是

玉帝吟歌畢乃命太微天帝君使坐引萬靈  
於房軒散華香於玉宇陳天鈞之廣樂響靈  
音於八海振冥波於天外鼓扇乘風千神羽  
衛方酌玉爵貯於瓊華之房九英穠薦素實  
丹方隱芝結饌鳳俎月漿玉攝重奏玄羽運

觴流連於八瓊之室曲宴於九琳之堂於是

上皇玉帝君方凝神遐想高詠絕玄忽然而

歎曰上契玄範通達冲微亦深矣哉子既司

帝位受事玉虛飛仙朝於金闕四明輔於輪

側遐眎空山領括天嶽應和絕唱攄讚妙慧

表三

三

誠宜極觀幽文冲契上法高會秀感其勉之

乎乃命上皇太老真人開瓊珠之篋出玉清

隱書隱玄羽經以傳太微天帝君於是帝君

下席稽辭於上皇之前再拜受書出付太微

上真羽玄玉郎以授諸上清真人及太素三



元高上玉賢之賓又帝君領括衆天試觀十方諸有宿命之人真仙之會及有帝簡金書百玉錄籍之名者乃得授傳之耳侍書玉童玉女各四十五人主司有經者之身糾罪於司命紀過於三元密慎者則享福漏泄者則禍纏苦樂立應於七祖罪福交會於當年三天司察奏之帝君書罪錄過无不上聞善惡違情可不慎焉

上皇玉慧玉清隱書者乃高上之訣辭玉帝之靈章也一名洞景金玄隱玄羽經玉帝君



藏經於景雲之闕瓊霞之房封以丹藥之篋  
閱以雲錦之囊主以太老上真侍以玄宗玉  
童使七百年中得傳三人自非真仙之名帝  
圖玉錄者不得聞見此經得見之者飛仙上  
清傳授之法皆五老授圖太一試觀故能攝

生十方領會洞天啓誓丹青軟血爲盟先齋  
七百日然後傳之盟用青錦三十尺金環兩  
雙所以重誓冥科崇約帝君上登玉清累祖  
胎仙漏泄寶文七世被殃繫魂鬼於死戶之  
下伐年命於五道之津三官考毒已無仙冀

切身殊於水火險巖過於履冰可不慎哉可不慎哉

玉清隱書金玄羽經皆虛皇之寶書玉帝所  
祕藏三天司察糾諸違慢之罪兆登齋之日  
侍經玉童玉女上聞帝君靈音既震則太一

承三

鑒試帝尊下觀太老侍側羽仙司真矣兆當  
清齋入室淨服燒香唯精唯專然後乃十轉  
誦經耳

洞景金玄玉清隱書

玄玄虛上四靈敷篇玉慧散魔六度休陳高



會三元朝宴九真萬靈受事玉帝隱玄九和  
百會參乘法輪流浪高軒立景上元道達无  
方體一凝神冲化合變七道齊分保生玉清  
逍遙虛津陰察萬兆括領洞天魏魏德宇裁  
裁高尊雙景翼靈四映二玄玉道交換萬範  
流全周落天度七變九旋觀化太空飛步玉  
宸清波遠鏡道悟上真精微太虛高唱絕玄  
於是八素同期俱朝玉清檄命太微徵召萬  
靈三元奏簡五老會庭高真森羅金仙殊形  
羽裙玉袂錦帔流鈴綠霞被素玉室發精音

響太和萬唱絕冥靈光八暉七氣混生公子  
合變帝一凝形妙詠神慧玉道隱經靈音瓊  
散玄鄉音續呈五皇命駕高秀皇庭玄上招仙  
玉帝之旌五嶽神王輔輪四明二道方塗理  
會上仙洞天高觀妙景雲京天扉廓散靈禁  
開明騰舞太无七神常生雙宴空洞遊夢上  
清精感遠暢道合无名十絕交和二象虛停  
攝元理氣萬化渾成錄簡雲房寶籍高靈澄  
神紫虛命胡可傾或乃神元妙接逸觀常流  
四玄總映飛光電幽日華雙運紫庭照軀道



悟上真七靈同符神機穎速八皇定書名奏  
帝堂羽籍太无身宴錄房飛行玉虛南宮受  
仙七元反胎寢映高瓊變升神衢霄歌玄唱  
帝賓同居保茲玄歸丹皇運珠上一赤子凝  
天伯无妙眇雲景鬱鬱雲立手排金扉身荷  
玉符朱霄霞煥八光仰投體矯冥真攝生萬  
流保景會辰長宴玉州於是罪滅三塗靈吹  
九辰納真紫房五皇攜仙保會絳宮逸宅丹  
玄十轉五迴靈震萬原香風八披惡魔絕煙  
萬萬千千來對帝前仙皇告符道達三真瓊

音上充七世无間令我飛仙名遷玉門三氣  
纏綿九鬼已分帝一變景萬化亦臻七度上  
徧三光映真對滅五道伐破胞根雙皇俠守  
把符十玄玉籍已明福盈龍泉陵梵履昌五  
氣合延叅乘太一同昇帝軒并命公子奉籍

七神黃錄刻名握節上遷飛映玉華煥落靈  
元滅魔散禍長閉帝宮玄氣四霏大混虛冲  
靈飛外輔六丁注中雲行雨施流布三宮九  
皇下視上策隱龍月母同軒徧蓋帝壙披朱  
巾羽鳴鈴華峯越出地戶泉曲之梁五老合



符徊金帝鄉俱過水火混一紫房七開受仙  
朝會玉堂九曜同生五華運光八氣慶合十  
絕牢張上帝歡熙玄母常康九靈同期左弼  
右卿太无結暉萬氣混并上登洞房徊合玉  
清神風扇扉紫霞綠經鬱洞靈機九和百明

承三

六

神對金霄逸羽龍京景福萬塗七祖順生各  
保南仙莫不胎嬰九合三離素華繞形福景  
日王併羽月靈太一名魔九天校精拔迴死  
積越度仙庭司命奏籍帝一混并三元把符  
七神虛營穢氣紛紛血尸沉零絕根反胎萬

氣以成太素錄圖金仙同駟大福纏綿累支  
同榮寶藏秀華三關霄清白氣徘徊凝鬱珠  
瓊飛浪玉晨長保劫齡五暉纏曜七門受明  
神符散慧理氣攝靈右徊洞陽左攜无英公  
子奉籍內守桃康玄母抱圖五神黃寧胞根  
八解皇老刻名九結披散五毒攝精拔出三  
界反胎仙庭七元解羅累祖受生寶錄太无  
俱濟神營六府煥爽金書羽經世爲真仙披  
落錦青帝師纏綿合景玉清散香龍窻玄合  
五城足躡景衢手排四明八暉九鍊飛步雲



京領會六淵刻名八瓊五通七合三氣乃并  
萬條重華世保仙靈把持玉符身昇羽庭徊  
風合化玉帝隱經長契壹運上願必成受帝  
之恩上朝玉清

玉清隱書隱玄羽經一名洞景金玄玉帝所

祕藏修此之法當先行大混百神變化雌雄  
及帝一上道然後乃得續行之耳此之靈章  
帝皇之寶篇解七祖之憊結保萬神於胎元  
攝生道於十方振靈音以上充萬徧既周則  
身耀金晨爾乃靈霞妙感俯徊雲輪鳴鈴太

霄列位上真所以俯仰殊格未行其重故也  
當以本命之日清齋入室燒香左右北面再  
拜乃心存於玉帝瓊元君求得解七玄之愆  
乞已神仙畢平坐誦經誦經三徧輒一過讀  
高上滅魔王帝神慧是夕當十轉隱經四讀  
帝慧也讀畢乃臨目內視夷神平氣坐卧隨  
意當叩齒三十通而微祝曰

五帝大慧是謂隱玄十轉四迴滅魔召真七  
靈同期大混五神瓊音八震上元七玄玄風  
散靡扇伐胞根長保胎嬰世受真仙上昇上



清玉帝之軒畢又叩齒三十通咽液十過於  
是百神並會五藏夷平帝君歡熙太一保生  
體清氣固魂柔魄寧司命定錄皇老書名人  
无哭已飛輪玉清胞結解散八暉同形大福  
纏綿七玄同榮十轉既竟心拜四方所以尊

妙高靈也長齋之士絕交人事體清服潔隱  
靜別處亦可日日誦習或可甲子之日及諸  
八節之日此皆上元朝宴之時不必須待本  
命日爾乃行事也夫十轉隱經之時皆太一  
監察司命定生萬靈混合帝君凝形三官會

真九房受靈是其夕也當有玄感妙應靈瑞  
吉祥然後八素鬱軀三元授真也

夫修此之道惟使精專存真念氣心誠苦密  
憂樂輒軻不忘於至道然後冥感易會法輪  
速昇晨登太霄飛行陰房矣若乃情散萬念

卷三

精誠不固形屍穢濁心无至慕犯慢靈禁動  
違科素者則帝君糾其罪禍敗纏其軀已身  
无仙冀七玄更被囚魂鬼入風火年劫增其  
尤奉禁者靈仙犯違者身誅也

道士體不平和覺疾病之處可隱靜別室啓



乞神明求得解脫愆羅及七玄之罪聽得轉  
經存念真氣禮祝如法施行都畢乃靜身安  
寢自然魂胎內固三關受靈邪毒散出體爽  
氣平既悟之後覺身體康寧都无復痾疾矣  
若他人疾病有諸急難之地皆聽爲轉經當

先啓告神靈北向再拜說其名字於玉清瓊  
元君求得上解其愆及七祖之罪濟生十方  
身勉八難然後燒香隱誦祝請如法大福皆  
應身登齋入室七日轉經名曰大混百神朝

會帝一解愆脫羅攝生濟厄无不受恩此玉

帝上法不可輕履屍穢及干冒淹濁三天察  
過罪同漏泄慎之慎之

上清高上滅魔洞景金元玉清隱書經





